

U skladu sa članom 12. i članom 56. Zakona o korištenju obnovljivih izvora energije i efikasne kogeneracije ("Službene novine Federacije BiH", broj 82/23), te člana 20. Statuta Operatora za obnovljive izvore energije i efikasnu kogeneraciju, na prijedlog Uprave, Upravni odbor Operatora za obnovljive izvore energije i efikasnu kogeneraciju, na 8. sjednici održanoj dana 19.12.2024. godine, donio je

UPUTSTVO O RADU BALANSNE GRUPE OIE

Član 1. (Ciljevi Uputstva)

Uputstvom o radu Balansne grupe OIE (dalje: Uputstvo) se uređuje sljedeće:

- pravila za registraciju članova Balansne grupe OIE,
- način realizacije plaćanja troškova balansiranja za članove Balansne grupe OIE,
- pravila za pripremu i dostavljanje planova proizvodnje iz postrojenja koja su članovi Balansne grupe OIE,
- povećanje odgovornosti proizvođača iz OIEiEK, koji su članovi Balanse grupe OIE, za postignuto odstupanje između ostvarene i planirane proizvodnje,
- pravedno alociranje troškova balansiranja na članove Balansne grupe OIE koji su učestvovali u debalansu Balansne grupe OIE i
- stimulisanje članova Balansne grupe OIE da povećaju kvalitetu planiranja proizvodnje u svojim elektranama.
- ostala pitanja vezana za neometan rad Balansne grupe OIE.

Član 2. (Obaveza primjene Uputstva)

Uputstvo je obavezujuće za:

- Sve članove Balansne grupe OIE
- Balansno odgovornu stranu na koju Operator za OIEiEK prenese svoju balansnu odgovornost u ime članova Balanse grupe OIE,

Član 3. (Izrazi i terminologija)

Izrazi i terminologija koji se koriste u Uputstvu imaju značenja utvrđena Zakonom o korištenju obnovljivih izvora energije i efikasne kogeneracije, Zakonom o električnoj energiji Federacije Bosne i Hercegovine, Zakonom o energiji i regulaciji energetskih djelatnosti u Federaciji Bosne i Hercegovine i Tržišnim pravilima.

Član 4. (Registracija članova Balansne grupe OIE)

- 1) Svaki kvalifikovani proizvođač koji sa Operatorom za OIEiEK ima potpisan važeći ugovor o otkupu električne energije ima pravo da se registruje kao član Balansne grupe OIE.
- 2) U svrhu registracije člana Balansne grupe OIE, kvalifikovani proizvođač iz stava (1) ovog člana dužan je da Operatoru za OIEiEK podnese zahtjev za sklapanje ugovora o pristupu Balansnoj grupi OIE, a u kojem će se pobliže definisati prava i obaveze člana Balansne grupe OIE.
- 3) Zahtjev iz stava (2) ovog člana podnosi se na propisanom obrascu ZPBG koji čini sastavni dio ovog Uputstva (Prilog broj 1).

- 4) Uz zahtjev iz člana (2) ovog člana podnosilac zahtjeva prilaže ovjerenu kopiju ugovora iz stava (1) člana.
- 5) Po zahtjevu iz stava (2) ovog člana Operator za OIEiEK donosi pozitivnu odluku ukoliko podnosilac zahtjeva ispunjava uslove ovog Uputstva, te negativnu odluku ukoliko podnosilac zahtjeva ne ispunjava uslove iz ovog Uputstva.
- 6) Operator za OIEiEK donosi odluku iz stava (5) u roku od 30 dana od dana kompletiranja zahtjeva.
- 7) Na osnovu pozitivne odluke iz stava (5) ovog člana, podnosilac zahtjeva potpisuje Ugovor o pristupu Balansnoj grupi OIE (u daljnjem tekstu: Ugovor) sa Operatorom za OIEiEK.
- 8) Ugovor iz stava (7) najmanje definiše sljedeće:
 - rokove, način i format dostavljanja satnih planova proizvodnje članova Balansne grupe OIE prema nadležnom BOS-u;
 - način, rokovi i formati dostavljanja ostalih podataka koji po potrebi BOS zatraži od člana Balansne grupe OIE pisanim putem (dopisom ili e-mailom);
 - način, rokovi dostave računa i sadržaj računa za načinjeni debalans Balansne grupe OIE i članova Balansne grupe OIE;
 - način i rokovi plaćanja troškova debalansa koje načini član Balansne grupe OIE, a koji su obračunati u skladu sa Uputstvom i Tržišnim pravilima, i
 - početak primjene Ugovora.

Član 5.

(Obaveze članova Balansne grupe OIE u vezi sa dostavljanjem podataka - vjetroelektrane)

- 1) Na zahtjev Balansno odgovorne strane (BOS) članovi Balansne grupe OIE čija su postrojenja vjetroelektrane su dužni dostaviti sljedeće podatke:
 - a) opšte podatke o karakteristikama vjetroagregata: nazivna radna snaga, naziv proizvođača, tip vjetroagregata, promjer rotora i visina vjetroagregata,
 - b) podatke o lokaciji vjetroelektrane: podatke o geodetskim tačkama pojedinog vjetroagregata (Gauss-Krugerova projekcija, oznaka vjetroagregata, x koordinata u smjeru sjevera i y koordinata u smjeru istoka te koordinata z (nadmorska visina)).
 - c) historijske podatke o radu vjetroelektrane:
 - radna snaga (**kW**) vjetroagregata i/ili radna snaga (**kW**) vjetroelektrane na pragu,
 - informacije o statusu raspoloživosti pojedinog vjetroagregata i cijele vjetroelektrane,
 - brzina vrtnje rotora (1/min).
 - d) historijske meteorološke podatke s pojedinog vjetroagregata: brzina (m/s) i smjer vjeta (stepeni) u odnosu na sjever mjeren na gondoli vjetroagregata i zakret gondole (stepeni) u odnosu na sjever.
 - e) historijske meteorološke podatke s mjernih stupova:
 - brzina (m/s) i smjer vjeta (stepeni) u odnosu na sjever sa svih mjerenih visina,
 - pritisak, temperatura i vlažnost zraka.

Ukoliko mjerni stubovi ne postoje ili podaci s mjernog stuba nisu iskoristivi zbog neodgovarajuće kvalitete, članovi Balansne grupe OIE dužni su obavijestiti nadležnu balansno odgovornu stranu o istome.

- 2) Članovi Balansne grupe OIE čija su postrojenja vjetroelektrane dužni su dostavljati podatke iz stava (1) tačke c), d) i e) ovog člana, BOS-u najkasnije do 10-og u tekućem mjesecu za prethodni mjesec.

- (3) Članovi Balansne grupe OIE, čija su postrojenja vjetroelektrane, dužni su dostavljati podatke iz stava (1) tačke c), d) i e) ovog člana u vremenskoj rezoluciji od 15 minuta, ukoliko BOS ne odredi drugačije.
- (4) Članovi Balansne grupe OIE, čija su postrojenja vjetroelektrane, mogu obavezu iz stava (2) ovog člana ispuniti na način da omoguće BOS-u pristup bazi traženih podataka.
- (5) Članovi Balansne grupe OIE, čija su postrojenja vjetroelektrane, dužni su najkasnije do 9:00 sati tekućeg dana obavijestiti BOS-a o planiranoj neraspoloživost vjetroagregata za sljedeći dan.
- (6) U slučaju promjena vezanih za obaveze iz stava (5) ovog člana nakon isteka roka propisanog prethodnim stavom, član Balansne grupe OIE je o nastalim promjenama dužan obavijestiti BOS bez odgađanja, čim takva okolnost uslijed koje je došlo do promjene postane poznata članu Balansne grupe OIE.
- (7) Članovi Balansne grupe OIE, čija su postrojenja vjetroelektrane, dužni su najkasnije do 9:00 sati tekućeg dana obavijestiti BOS o predvidivim ograničenjima u proizvodnji električne energije za sljedeći dan.
- (8) Obavijest o planiranoj neraspoloživosti iz stava (5) ovog člana, te obavijest o predvidivim ograničenjima iz stava (7) ovog člana, dostavlja se na način i u formatu određenom od strane BOS-a.
- (9) Članovi Balansne grupe OIE, čija su postrojenja vjetroelektrane, dužni su bez odgađanja obavijestiti BOS o neplaniranom prekidu proizvodnje električne energije, čije je procijenjeno trajanje duže od tri sata, a koje je nastupilo nakon isteka roka iz stava (7) ovog člana.
- (10) Uz obavijest iz stava (9) ovog člana o početku prekida proizvodnje članovi Balansne grupe OIE dužni su BOS obavijestiti o procijenjenom trajanju prekida proizvodnje, na način određen od strane BOS-a.

Član 6.

(Obaveze članova Balansne grupe OIE u vezi sa dostavljanjem podataka - solarne elektrane)

- (1) Na zahtjev Balansno odgovorne strane (BOS) članovi Balansne grupe OIE, čija su postrojenja solarne elektrane, dužni su dostaviti sljedeće opšte podatke o solarnoj elektrani:
 - a) pojedinačna snaga fotonaponskih panela (kWp) i ukupan broj fotonaponskih panela,
 - b) ukupna nazivna snaga fotonaponskih panela (kWp),
 - c) broj nizova fotonaponskih modula,
 - d) broj fotonaponskih modula po nizu,
 - e) pojedinačna izlazna snaga izmjenjivača (invertora) (bez ograničenja),
 - f) broj izmjenjivača i ukupna izlazna snaga svih izmjenjivača (bez ograničenja),
 - g) proizvođač i tip fotonaponskih panela i izmjenjivača,
 - h) postojanje sistema za praćenje Sunca (tracking sistem po jednoj ili dvije ose),
 - i) nagib (iskazan u stepenima),
 - j) orijentacija (iskazana u stepenima u odnosu na jug) solarne elektrane (u slučaju fiksne instalacije).
- (2) Na zahtjev BOS-a članovi Balansne grupe OIE, čija su postrojenja solarne elektrane, dužni su BOS-u dostaviti i sljedeće historijske podatke o radu sunčane elektrane u satnoj ili 15- minutnoj rezoluciji:
 - a) ozračenost s fotonaponskih modula
 - b) temperatura fotonaponskih modula
 - c) nazivna izmjenična snaga
 - d) nazivna istosmjerna snaga.
- (3) Na zahtjev BOS-a, članovi Balansne grupe OIE, čija su postrojenja solarne elektrane, dužni su dostavljati historijske

- podatke o radu elektrane iz stava (2) ovog člana BOS-u najkasnije do 10-og u tekućem mjesecu za prethodni mjesec.
- (4) Članovi Balansne grupe OIE, čija su postrojenja solarne elektrane, mogu obavezu iz stava (3) ovog člana ispuniti i na način da omoguće BOS-u pristup bazi traženih podataka.
- (5) Članovi Balansne grupe OIE, čija su postrojenja solarne elektrane, dužni su osigurati mjerenja podatka iz stava (2) ovog člana.
- (6) Članovi Balansne grupe OIE, čija su postrojenja solarne elektrane, dužni su najkasnije do 9:00 sati tekućeg dana obavijestiti BOS-a o planiranoj neraspoloživost postrojenja za sljedeći dan, na način i prema formatu određenom od strane BOS-a.
- (7) Članovi Balansne grupe OIE, čija su postrojenja sunčane elektrane, dužni su bez odgađanja obavijestiti BOS-a o neplaniranom prekidu proizvodnje električne energije, čije je procijenjeno trajanje duže od tri sata, a koje je nastupilo nakon roka iz stava (6) ovog člana.
- (8) Uz obavijest iz stava (7) ovog člana o početku prekida proizvodnje članovi Balansne grupe OIE dužni su BOS-a obavijestiti o procijenjenom trajanju prekida proizvodnje, na način određen od strane BOS-a.

Član 7.

(Obaveze članova Balansne grupe OIE u vezi sa dostavljanjem podataka - hidroelektrane)

- (1) Članovi Balansne grupe OIE, čija su postrojenja hidroelektrane, dužni su, na zahtjev BOS-a, BOS-u dostaviti dostupne historijske podatke o protocima mjerenima na lokaciji postrojenja i o instaliranoj snazi (kW) hidroelektrane u satnoj i 15 - minutnoj rezoluciji, te tehničke karakteristike postrojenja: vrsta i instalirana snaga turbine, vrsta i instalirana snaga generatora i instalirani protokol.
- (2) Članovi Balansne grupe OIE, čija su postrojenja hidroelektrane, dužni su najkasnije do 9:00 sati tekućeg dana obavijestiti BOS-a o planiranoj neraspoloživosti i ograničenjima postrojenja za sljedeći dan na način i prema formatu određenom od strane BOS-a.
- (3) Članovi Balansne grupe OIE, čija su postrojenja hidroelektrane, dužni su bez odgađanja obavijestiti BOS o neplaniranom prekidu proizvodnje električne energije čije je procijenjeno trajanje duže od tri sata, a koje je nastupilo nakon roka iz stava (2) ovog člana.
- (4) Uz obavijest iz stava (3) ovog člana o početku prekida proizvodnje članovi Balansne grupe OIE dužni su BOS-a obavijestiti o procijenjenom trajanju prekida proizvodnje na način određen od strane BOS-a.

Član 8.

(Dostavljanje planova proizvodnje)

- (1) Članovi Balansne grupe OIE dužni su, najkasnije do 9:00 sati tekućeg dana, BOS-u dostavljati satne planove proizvodnje električne energije za svoja postrojenja za sljedeći dan putem elektronske pošte u formatu kojeg odredi BOS.
- (2) Pod planom proizvodnje električne energije podrazumijeva se planirana satna količina proizvedene električne energije koja se isporučuje u elektroenergetsku mrežu.
- (3) Dostavljeni plan proizvodnje moguće je mijenjati na način da se BOS-u dostavi novi plan proizvodnje najkasnije do isteka roka propisanog stavom (1) ovog člana.
- (4) Ukoliko proizvođač ne dostavi dnevni raspored rada u propisanim rokovima ili formatu propisanom od BOS-a, smatraće se da za taj dan proizvođač nije planirao proizvodnju električne energije (planirana proizvodnja će za sve sate u tom danu biti jednaka 0 kWh), te će se za taj period odstupanje isporučene količine električne energije računati u odnosu na planiranu proizvodnju od 0 kWh.

- (5) Članovi Balansne grupe OIE iz stava (1) ovog člana dužni su bez odgađanja obavijestiti BOS (pismeno putem e- maila) o neplaniranom prekidu proizvodnje električne energije, čije je procijenjeno trajanje duže od tri sata, a koje je nastupilo nakon roka iz stava (1) ovog člana.
- (6) Uz obavijest iz stava (5) ovog člana o početku prekida proizvodnje članovi Balansne grupe OIE dužni su BOS obavijestiti o procijenjenom trajanju prekida proizvodnje na način određen od strane BOS-a.
- (7) Ako članovi Balansne grupe OIE iz stava (1) ovog člana obavijeste BOS o neplaniranom prekidu proizvodnje električne energije u roku kraćem od sat vremena od početka neplaniranog prekida i o predviđenom trajanju prekida proizvodnje, razdoblje predviđenog trajanja prekida proizvodnje se neće računati prilikom izračuna odstupanja planova proizvodnje.

Član 9.

(Energetski obračun debalansa Balansne grupe OIE)

- (1) BOS će najkasnije do 15-og u tekućem mjesecu za prethodni mjesec izračunati satna odstupanja planova proizvodnje od ostvarenih satnih vrijednosti isporučene električne energije za Balansnu grupu OIE.
- (2) Energetski obračun debalansa Balansne grupe OIE računa se kao razlika između ostvarene i planirane proizvodnje Balansne grupe OIE za svaki period poravnanja (jedan sat):

$$\Delta P_{BG} = P_{ostv} - P_{plan}$$

gdje je:

ΔP_{BpG} - debalans Balansne grupe OIE

P_{ostv} - zbirna ostvarena proizvodnja svih proizvođača članova Balansne grupe u posmatranom periodu

P_{plan} - zbirna planirana proizvodnja svih proizvođača članova Balansne grupe u posmatranom periodu.

- (3) Ako je debalans Balansne grupe OIE negativan ($\Delta P_{BpG} < 0$), Balansna grupa je proizvela manje električne energije od planirane, pa je ostvaren negativan debalans Balansne grupe OIE.
- (4) Ako je debalans Balansne grupe OIE pozitivan ($\Delta P_{BpG} > 0$), Balansna grupa je proizvela više električne energije od planirane, pa je ostvaren pozitivan debalans Balansne grupe OIE.

Član 10.

(Energetski debalans pojedinačnog proizvođača unutar Balansne grupe OIE)

- (1) Energetski debalans pojedinačnog proizvođača računa se kao:

$$\Delta P_i = P_{iostv} - P_{iplan}$$

gdje je:

ΔP_i - debalans između ostvarene i planirane proizvodnje pojedinog proizvođača u posmatranom periodu poravnanja

P_{iostv} - ostvarena proizvodnja pojedinačnog proizvođača u posmatranom satnom periodu poravnanja

P_{iplan} - planirana proizvodnja pojedinačnog proizvođača u posmatranom satnom periodu poravnanja.

- (2) Ako je ΔP_i negativan, proizvođač je proizveo manje električne energije od planirane, pa je ostvaren negativan debalans pojedinačnog proizvođača.
- (3) Ako je ΔP_i pozitivan, proizvođač je proizveo više električne energije od planirane, pa je ostvaren pozitivan debalans pojedinačnog proizvođača.

(4) Energetski obračun debalansa Balansne grupe OIE i debalansa pojedinačnih proizvođača osnova je za finansijsko poravnanje debalansa unutar Balansne grupe OIE.

Član 11.

(Obračun troška debalansa)

- (1) Ukupan trošak debalansa na satnom nivou Balansne grupe OIE računa se kao proizvod debalansa Balansne grupe i odgovarajuće cijene debalansa u periodu poravnanja:

$$T_{BG} = \Delta P_{BG} \times S_{BG}$$

gdje je:

T_{BG} - trošak debalansa Balansne grupe OIE za period poravnanja (jedan sat),

ΔP_{BG} - debalans Balansne grupe OIE za period poravnanja, S_{BG} - odgovarajuća cijena debalansa Nezavisnog operatora sistema u Bosni i Hercegovini (NOS BiH) u periodu poravnanja (cijena koja se primjenjuje zavisno od toga da li je grupa ostvarila pozitivan ili negativan debalans).

- (2) Dnevni obračun troška debalansa Balansne grupe OIE računa se kao suma pojedinačnih satnih troškova debalansa u tom danu.
- (3) Obračunsko razdoblje je kalendarski mjesec.
- (4) Trošak debalansa pojedinog proizvođača unutar Balansne grupe OIE za period poravnanja alocira se prema sljedećem algoritmu:

a) ukoliko su odstupanja pojedinog člana Balansne grupe OIE, u određenom balansnom intervalu, u smjeru suprotnom od smjera ukupnog neto odstupanja svih članova Balansne grupe OIE u tom balansnom intervalu unutar grupe, taj član ne plaća troškove za posmatrani balansni interval (u tom intervalu troškovi balansiranja tog proizvođača su jednaki nuli);

b) ukoliko su odstupanja određenog člana Balansne grupe OIE u određenom balansnom intervalu u smjeru ukupnog neto odstupanja svih članova Balansne grupe OIE u tom balansnom intervalu unutar grupe, taj član plaća udio u troškovima balansiranja za posmatrani balansni interval proporcionalno učešću svojih odstupanja u ukupnom neto odstupanju svih članova unutar Balansne grupe OIE, u tom balansnom intervalu.

- (5) Trošak debalansa za pojedinog člana Balansne grupe OIE za slučaj kada su njegova odstupanja u smjeru ukupnog debalansa Balansne grupe OIE računa se kao proizvod procentualnog učešća njegovog odstupanja u ukupnom odstupanju Balansne grupe OIE u posmatranom intervalu (zaokružen na četvrtu decimalu) i odgovarajuće cijene debalansa NOS BiH u periodu poravnanja:

$$TD_i = PU_i \times S_{BG}$$

gdje su:

TD_i - trošak debalansa pojedinog člana

PU_i - procentualno učešće pojedinog člana u ukupnom debalansu Balansne grupe OIE u posmatranom satnom intervalu koje se računa kao:

$$PU_i = (\Delta P_i / \Delta P_{BG}) \times 100\%$$

- (6) Na pismeni zahtjev člana Balansne grupe OIE, BOS će dostaviti podatke o vrijednostima odstupanja za pojedino obračunsko razdoblje.

Član 12.

(Način dostave podataka)

- (1) Članovi Balansne grupe OIE su dužni dostavljati tačne i istinite podatke BOS-u određene ovim Uputstvom, u

- navedenim vremenskim rokovima, propisanoj vremenskoj rezoluciji, putem e-maila, bez da su na to posebno pozvani ili upozoreni od strane BOS-a.
- (2) Članovi Balansne grupe OIE dužni su dostavljati tačne i istinite podatke u formatu pogodnom za daljnju obradu, a kojeg odredi BOS.
- (3) Članovi Balansne grupe OIE dužni su, po pozivu BOS-a, dostaviti i druge podatke koje BOS smatra potrebnim u svrhu vođenja Balansne grupe OIE, u rokovima i vremenskim razdobljima koje naznači BOS.
- (4) U slučaju promjene načina dostave i/ili formata historijskih podataka o radu, obavijesti i/ili planova proizvodnja, BOS će obavijestiti članove Balansne grupe e-mailom i objavom na web stranici BOS-a najkasnije 10 dana prije promjene.

Član 13.

(Razmjena podatka između BOS-a i Operatora distributivnog sistema i Operatora prenosnog sistema)

- (1) Razmjena podataka neophodnih za rad Balansne grupe OIE regulisaće se ugovorom o uređenju međusobnih odnosa između BOS-a Balansne grupe OIE i operatora prijenosnog sistema, te ugovorima između BOS-a Balansne grupe OIE i operatora distributivnog sistema u Federaciji Bosne i Hercegovine.
- (2) Ugovori iz stava (1) ovog člana sadrže najmanje, načine dostave ili omogućavanje pristupa sljedećem:
- podacima o ostvarenim satnim isporukama električne energije postrojenja članova Balansne grupe OIE priključenim na distributivnu mrežu, unutar dana isporuke;
 - podacima o ostvarenim satnim isporukama električne energije postrojenja članova Balansne grupe OIE priključenim na prenosnu mrežu, unutar dana isporuke;
 - podacima o ostvarenim satnim isporukama električne energije postrojenja članova Balansne grupe OIE, do 5-og u tekućem mjesecu za prethodni mjesec,
- (3) Ugovor iz stava (1) ovog člana definišaće i način i format dostave ili pristupa obračunskim podacima iz tačaka a), b) i c) stava (2) ovog člana.

Član 14.

(Obaveze BOS-a)

- (1) BOS Balansne grupe OIE je na osnovu dostavljenih planova proizvodnje članova Balansne grupe OIE obavezan planirati proizvodnju električne energije za Balansnu grupu OIE, te prijavljivati planske rasporede NOS-u skladu sa propisanim procedurama NOS BiH i Tržišnim pravilima.
- (2) U svrhu jasnijeg prikaza učešća članova u debalansu Balansne grupe OIE, na zahtjev pojedinog člana, BOS je obavezan omogućiti i prikaz obračuna debalansa Balansne grupe OIE po pojedinim tehnologijama.
- (3) BOS je obavezan do 31.03. tekuće godine javno objaviti na svojoj web stranici godišnji izvještaj o radu Balansne grupe OIE za prethodnu godinu.

- (4) Godišnji izvještaj iz stava (3) ovog člana sadrži informacije o:
- ukupno fakturisanim/plaćenim mjesečnim troškovima (u KM) energije balansiranja Balansne grupe OIE;
 - jediničnim mjesečnim troškovima balansiranja (KM/MWh) po primarnim izvorima postrojenja unutar Balansne grupe OIE (vjetroelektrane, solarne elektrane i ostale elektrane);
 - iznosima odstupanja (ukupno pozitivno i ukupno negativno odstupanje) od planova proizvodnje po primarnim izvorima postrojenja (MWh) unutar Balansne grupe OIE;
 - ukupno odstupanje (ukupno pozitivno i ukupno negativno odstupanje) od planova proizvodnje Balansne grupe OIE (MWh);
 - ostale informacije o radu Balansne grupe OIE.

Član 15.

(Povjerljivost podataka)

- (1) BOS je dužan osigurati tajnost podataka koje u svrhu vođenja Balansne grupe OIE dobije od članova Balansne grupe OIE.
- (2) BOS je ovlašten koristiti podatke dobivene od članova Balansne grupe OIE i dostavljati ih operatoru prijenosnog sistema i operatorima distributivnog sistema i drugim nadležnim tijelima i institucijama u BiH u sljedećim slučajevima:
- kada je BOS dužan dostavljati podatke radi planiranja proizvodnje i raspoloživosti mreže;
 - u svrhu usluge prognožiranja proizvodnje električne energije ili svrhu izrade analiza, procjena prognoza ili drugih stručnih dokumenata u svrhu poboljšanja planiranja razvoja i upravljanja prenosnom i distributivnom mrežom;
 - u slučaju podataka vezanih za pojedinačnog člana Balansne grupe, a koje zatraži privatna treća strana uz obaveznu prethodnu pisanu saglasnost člana Balansne grupe koji je dostavio podatke BOS-u;

Član 16.

(Nadzor)

Federalno ministarstvo energije, rudarstva i industrije će, u saradnji sa Operatorom za OIEiEK, vršiti analizu rada Balansne grupe OIE, te po potrebi, predlagati korekcije.

Član 17.

(Stupanje na snagu)

Ovo Uputstvo stupa na snagu osmog dana od dana objavljivanja u "Službenim novinama Federacije BiH", a počinje se primjenjivati dvanaest mjeseci nakon stupanja na snagu.

Broj 01-1070/24

19. decembra 2024. godine
Mostar

Predsjednik
Haris Lulić, s. r.

Zahtjev za sklapanje ugovora o pristupu Balansnoj grupi OIE

Podnosimo zahtjev za sklapanje ugovora o pristupu Balansnoj grupi OIE u skladu sa članom 4. Uputstva o radu Balansne grupe OIE.

A. OPŠTI PODACI PODNOSIOCA ZAHTEVA

Naziv/ime podnosioca:	
Adresa:	
Jedinstveni identifikacioni broj (JIB):	
Telefon:	
Broj mobitela:	
Fax:	
Elektronska adresa:	
	Ime:
Odgovorno lice	Prezime:
	Adresa:
	Ime:
Kontakt osoba	Prezime:
	Adresa:

B. OSNOVNI TEHNIČKI PODACI

Naziv postrojenja kvalifikovanog proizvođača iz kojeg Operator za OIEIEK otkupljuje električnu energiju.

Uz ovaj zahtjev podnosilac zahtjeva prilaže ovjerenu kopiju ugovora o otkupu električne energije.

M.P.

Potpis ovlaštene osobe:

NAPOMENA:

Molimo vas da podatke popunjavate plavom hemijskom olovkom ili pisačom mašinom.

Ukoliko želite, ovaj formular možete naći na našoj web stranici i ispuniti ga u elektronskom obliku.

Molimo da svojim paraforom ovjerite svaku stranicu zahtjeva.